

E bisje honnele derf merr

Om letzde Freidaach kame merr uff de Markt, die Fraa unn ich, unn doo seh merr, wie dess Kättche unn die Paula vorm Scharfe Eck stehe unn die Kepp zesommestecke. Ei Gute, hawwe merr gesacht, no wie – unn wo sinn dann eier Männer?

De Karl sitzt dehoom unn guckt Fernseh, irchendas mett Schifahrn, sacht die Paula.

Unns Kättche: Moiner habb ich in die Abbedek geschickt, der soll merr was ferr moin Schnuppe holle.

Unn was habt ihr ze verzähle, was kooner heern soll?, frooch ich die zwaa.

Dess Kättche zeicht mett ihm Kinn Richtung Gemies: Mir hawwes von der doo driwwe.

Ich guck hie unn seh, wie e Fraa in unserm Alder enn Wersching in die Hond nimmt unn den Monn vom Stond was froocht unn der de Kopp schittelt.

Was iss dann mett der? sach ich.

Doo pischbert moi Fraa: Mir saache zu der nor „ess Schnäppche“, weil die immer nooch dem billichste Zeich guckt. Ich habb geheert, die unn ihrn Monn fahrn somsdachs in drei odder vier Großmärkt unn suche sich die Sonderoogebote raus – unn iwverall frooch se nooch Prozente.

Die Paula nickt: Wissder warum de Bauschmer de Kopp geschittelt hott? Die hotten gefroocht, obse de Wersching billicher krieche kann.

Dess Kättche verzieht ihr Schnut: Die solle sich nit so oostelle, die hawwe alle zwaa geschafft. Ich mecht nit wisse, wass die sesomme ferr Rende hawwe, die brauche bestimmt nit uff de Penning – uff de Cent ze gucke. Moin Schorsch sacht immer, Kättche, ferr wen solle merr sparn? - mir hawwe unser gonz Lewe geschafft unn jetz kenne merr uns was gönne. Recht hotter, moin Schorsch. Mir gewwe unser Geld aus - mir hawwe uns grad e nei Audo bestellt.

In dem Aacheblick kimmt de Schorsch, sacht Gude unn stellt sich bei uns.

Hosde was krieht?, hotten gleich dess Kättche gefroocht.

De Schorsch gibt zur Antwort: In de Abbedek war gar nix los, sunnst mussde immer warte.

Obde was krieht host in de Abbedek? frächt dess Kättche de Schorsch nochemol unn schunn e bisje lauter.

De Schorsch schittelt de Kopp: Naa.

Doodruff hosde die Stimm vom Kättche noch besser geheert: Naa? In de Abbedek gibt's nix ferrn Schnuppe?

De Schorsch guckt so e bisje on ihr vorbei: De Abbedeker hott merr was gezeichnet unn dess hätt drei Euro sechzich gekosst. Drei sechzich, siwwe Mark ferr e paar Droppe! Ich habben gefroocht, obs

doodruff aach Rabatt gibt. Unn weils koon gibt, habb ich zum Abbedeker gesacht, ich will mich emol wo onnerst umgucke unn bin widder fort.

Doo hotten dess Kättche oogegauzt: Dess host du gemacht? - ei du blomierst joo die gonz Innung! Unn was soll ich jetz mache mett moim Schnuppe?

De Schorsch gonz ruhich: Heit owend dusde e bisje Salz ins Wasser unn ziehst dess dorch die Nas, dess iss besser als all die Droppe.

Du ... du ..., hotts Kättche gezischt, du käfst derr e nei Audo unn ich muss mett Wasser unn Salz auskumme. Ei loss merr moi Ruh, du alter Geizkraache!

Doo grinst de Schorsch unn guckt uns all de Reih nooch oo: Naa, geizich bin ich nit – awwer so e bisje honnele muss merr heit-zudaach, odder?

Eiern Honnes